

Tumberito Band ta cla pa Tumba Grandi

ORANJESTAD – Diabierna siman pasa a tuma luga e gran festival di Tumberito 2014. Un festival sumamente exitoso unda cu nos muchanan den categoria Infantil y Hubenil a sa di haci un impacto excepcional. Aruba henter a presencia tumbanan di gran calidad, cu un compaño musical di kita sombre. Tumberito Festival ta un festival unda cu ta promove y sostiene e genero di musica Tumba den e periodo di Carnaval. E meta di e festival aki ta pa stimula nos hobennan pa canta Tumba y contribui na cultura di Aruba. Cu e mes un proposito aki, mirando e acogida di e Tumbanan den Festival Tumberito, a dicidi di compaña Ex Reina Tumberita Eunice Albertsz den su traspaso pa Tumba Grandi. Eunice a competi semper den Festival Tumberito y na diferente ocasion



a cay den finalista y tambe a gana e titulo maximo. Cu e iniciativa aki Tumberito Festival conhuntamente cu Tumberito Band ta sostiene nos hubentud cu tin e deseo di competi cu e grandi nan. Director Musical di Tumberito Band, Raul Piar, miho conoci como 'El Maestro', no ta desconoci den e genero di Tumba. Un musico y can-



tante sumamente disciplina, dedica y cu amor grandi pa Musica, en special Tumba. Na Aruba Raul a dedica hopi di su tempo na aregla cantica, ex integrante di Rincon Boys y tambe como ingeniero di zonido na HD Solid Sound Recording Studio. Raul ta conoci na Boneiro como musico y cantante cu a yega di competi den varios festivalnan di canto y Tumba unda a conquista e titulo maximo na diferente ocasion. Tambe Tumberito Band ta acompaña Alexander James cu su Tumba Loco.

Tur hende por a nota e nivel di Festival ofreci durante Fes-



tival Tumberito, pues Aruba por spera algo grandi tambe pa cu nan participacion den

Festival di Tumba Grandi 2014, diasabra den Aruba Entertainment Center. □

